

四庫全書

史部

欽定四庫全書

皇朝文獻通考卷一百一

郊社考 十一

耤田祭

先農 儀注附

臣等謹按耤田之制上以奉梁盛下以勸農事稽古簡牒其典鉅矣我

朝重農務耕以開

王業舉

先農之祀開千畝之藉寬而秉耒於古有加焉逮夫

今日禮益備事益勤推之郡邑莫不順時循典以敬

從事又舉

先蠶祀禮

躬桑令典務食之源重衣之本以率天下粟帛豐贏婦

子恬熙此其端與

順治十年三月

詔舉行

先農祀典

十一年二月

世祖章皇帝行耕藉禮

親祭

先農壇

康熙十一年二月

聖祖仁皇帝行耕藉禮

親祭

先農壇禮儀與順治十一年同前期遣官祇告

奉先殿

雍正二年二月

世宗憲皇帝行耕耤禮

親祭

先農壇禮儀與康熙十一年同三推畢復加一推

頒發新製三十六禾詞使工歌左右隨行禮畢王以下行

慶賀禮停止筵宴自是每歲皆

親耕如儀

八月以藉田瑞穀宣付史館是年藉田內產瑞穀
一莖四穗者三本一莖三穗者三本一莖兩穗者
十二本順天府尹張令璜奏進羣臣請宣付史館
從之四年所產尤多有一莖九穗者

豐澤園所植稻亦然羣臣表賀宣付史館蓋瑞應頻
書不勝紀云

四年八月

命各直省俱行耕耤禮祭

先農壇是月奉

諭旨國以民為本民以食為天朕念切民依舉行耕耤之禮殫竭精誠為民祈穀於

上帝乃雍正二年三年耤田特產嘉禾今歲所產自一莖雙穗至九穗皆碩大堅好異于常穀朕見之心甚慰悅特令宣示廷臣益實有見於天人感召之理捷於影響

無纖毫之或與朕以至誠肫懇之心每歲躬耕藉田以重農事即蒙

上帝降鑒疊產嘉穀以昭休應豈人力之所強為乎禮曰天子為藉千畝諸侯百畝則耕藉之禮亦可通于臣下矣朕意欲地方守土之官俱行耕藉之禮使之知稼穡之艱難悉農民之作苦量天時之晴雨察地力之肥磽凡為官者存重農課稼之心凡為農者無苟安怠惰之習於養民務本之道大有裨益九卿詳議具奏尋奏上

金史卷一百一
請令奉天府尹各直省督撫及府州縣衛官于所
治地方擇潔淨之地設立

先農壇及耜田自雍正五年為始每歲仲春亥日各率
所屬行禮如儀所收米粟敬謹收貯以供祭祀之
粢盛其祭

先農壇之禮如祭

社稷凡大小武職官一體與祭俾知耕耜鉅典又以吉
林黑龍江二處將軍皆有民社之任令照直省之

制建立

先農壇致祭耕耤以重農事禮部於每年十月預擇次
年耕耤吉期奏

聞通行內外同日行禮

乾隆三年三月

皇上行耕耤禮

親祭

先農壇是歲初舉

欽定四庫全書

禮

皇朝文獻通考

親耕之禮前期六日

幸豐澤園演耕至日

親祭

先農壇遂詣耜田行三推禮畢復加一推禮成

上御齋宮王以下行慶賀禮

五年三月以閏歲春寒遣官致祭

先農壇禮部奏

親耕典禮原可間歲舉行今逢閏年節氣尚覺春寒更

衣行禮不無過于煩勞請暫行停止其致祭

先農壇遣官行禮從之

八年二月

詔遣官祭

先農壇用中和韶樂內閣奉

諭旨向來

先農壇親祭始用中和韶樂遣官則同小祀之例

朝日

夕月等中祀雖遣官仍用中和韶樂但不飲福受胙而已朕思國之大事在農

先農宜在中祀之列此次遣和親王恭代即照朝日

夕月等壇之例用中和韶樂永著為例

十九年三月重修

先農壇

十八年冬奉

諭旨朕每歲親耕耤田而

先農壇年久未加崇飾不足稱朕祇肅明禋之意今

兩郊大工告竣應將

先農壇宇修繕鼎新其外壩隙地老圃於彼灌園殊為

褻瀆應多植松柏榆槐俾成陰鬱翠庶足以昭虔妥

靈該部會同查明具奏總理工程王大臣遵

旨詳議次第修繕並

太歲殿

天神

地祇壇俱崇飾鼎新惟旗纛殿以前明舊制

本朝不於此致祭毋庸修葺孺外隙地計一千七百畝

乘時種樹交太常寺飭壇戶敬謹守護疏上從之

先農壇在正陽門外西南制方南向一成方四丈七尺

高四尺五寸四出陛各八級東南為瘞坎壇北正

殿五間東

神庫西

神厨各五間并亭各一東南為

觀耕臺臺前為耜田後為

具服殿東北為

神倉前為收穀亭後為祭器庫繚以周垣門南向歲

以仲春亥日

皇帝親饗

先農之神祭畢乃

躬耕耜田及秋玉粒告成所司以



聞擇吉收貯

神倉以供

天

地

宗廟

社稷之菜盛

二十三年二月

詔除耕藉設棚懸綵之例舊例相沿耕藉則設綵棚

皇上以其繁費無益

諭曰吉亥耜畝所重劬農黛耜青箱畚鍤蓐笠咸寓知
民疾苦之意而設棚懸綵以芘風雨義無取焉吾民
涼雨犁而赤日耘雖襁褓之尚艱豈炎濕之能避且
片時用而過期撤是中人數十家之產也其飭除之
三十九年三月

上親耕耜

詔嗣後耕耜時觀耕臺添設幄次

四十七年三月

皇上行耕耤禮

親祭

先農壇

臣等謹案吉亥劬農典禮綦重

天子壽逾古稀致勤民務維時侍儀之大學士尚書等

皆年逾七旬以上臣等恭讀是歲

御製耕耤禾詞仰惟

皇上聖壽無疆法

天行健固已協無逸而慶屢豐而大臣觀禮者復多龐眉
華首喜溢班聯洵千載罕逢之嘉會也

五十年三月

皇上行耕藉禮

親祭

先農壇是歲十一月奉

諭每歲春三月應祭

先農壇行耕耤禮禮部俱先期將祭祀日期及耤田一應事宜預行具題雖屬照例辦理但國家典禮以實不以文朕臨御以來兢兢以敬

天勤民為念

郊

壇大祀無不躬親即耤田親耕亦未嘗稍憚煩勞雖本年壽已七十有五猶親舉三推之典惟是春秋已高或恐步履稍遜若二三年後自揣精力如常偶一舉行

豈非熙朝盛事至本年甫經親行耕藉明歲應否躬
蒞自應候朕酌行乃禮部仍照例具題竟似每歲俱
親詣行禮者然豈不轉為具文耶我國家受

命延洪純嘏敷錫世世子孫若能皆似朕之敬勤不倦自
必景祚綿長享國久遠嗣後我子孫繼承奕禩惟當
不懈益勤凡遇親藉典禮若年在六十以內禮部自
應照例具題年年躬行耕藉之禮若年逾六十禮部
先期以親蒞或遣官之處具本題請庶鉅典不尚虛

文而展禮益昭誠恪著為令

皇帝親祭儀

歲仲春吉亥

皇帝親饗

先農前二日禮部尚書一人眡牲如儀

右眡牲

致齋

儀同
東西郊祀

先一日遣官一人詣

奉先殿祇告如常儀

右告祭

書祝版

眡割牲

眡祝版

儀同
東西郊祀

是日清晨太常寺卿率屬潔壇上下藉以稊薦為
瘞坎于壇東南隅設

先農神座于壇正中南向施黃幄工部官張

皇帝拜次于南階上如式

右設神座供張

將事之夕夜分太常寺卿率屬入壇具器陳牛一
羊一豕一登一釶二簋簋各二籩豆各十琖三十
鑪一鐙二壇南中設一案少西北向供祝版東設
一案西向陳禮神制帛一色青香盤一尊一爵三設
福胙于尊爵之旁加爵一牲陳于俎帛實于篚尊
實酒承以舟疏布幕勺具鑾儀衛冠軍使設洗于

壇東樂部率太常協律郎設中和韶樂及樂舞于
壇下東西分列器數與

東西郊祀同

右陳設

省盥

儀同
東西郊祀

辨行禮位壇上帷次為

皇帝拜位正中北向壇下東南為望瘞位東向陪祀王
公位樂懸北東西各二班百官位樂懸南東西各

五班重行異等東位西上西位東上均北面辨執
事位壇上太常寺司拜牌拜禱官各一人立

皇帝拜位左右司祝司香司帛司爵各一人光祿寺卿
二人侍衛二人太常寺贊荅福胙一人侍儀禮部
尚書侍郎都察院左都御史副都御史樂部典樂
各一人位東西序分立祝案尊案之次如常儀壇
下太常寺典儀一人司樂一人東立西面起居注
官四人西立東面糾儀御史四人禮部祠祭司官

四人引禮鴻臚寺官四人分立王公百官拜位之
次協律郎歌工樂工舞佾分立樂懸之次均東西
面掌座官率座人立于座坎之南北面

右辨位

其日五鼓步軍統領率所部清蹕除道

御道左右塗巷皆設布幃鑾儀衛陳

法駕鹵簿于

午門外不陪祀王公百官朝服祇候如常儀辰初三

刻太常寺卿赴

乾清門奏時

皇帝御祭服乘禮輿出宮前引後扈如儀

駕發警蹕

午門鳴鐘鼓導迎樂陳而不作羣臣跪送提鑪官左

右騎導詣壇如

郊祀之儀

右

鑾輿出宮

駕將至司祝奉祝版設於祝案禮部尚書一人率太常

寺卿屬詣

神庫上香行禮恭請

先農神位奉安壇座上如儀鴻臚寺官豫引陪祀王公

于壇門內按翼序立候

駕至隨行引陪祀百官東班于拜位南北面西班于拜

位西東面序立祇候

駕至壇東門內降輿贊引對引太常寺卿二人恭導

皇帝至壇東盥鑾儀衛官跪奉盥奉巾如儀贊引對引

恭導

皇帝由中階陞就拜位前立前引內大臣提鑪官侍衛

均于階下止立後扈大臣隨侍鴻臚寺官引陪祀

王公百官均就拜位典儀贊樂舞生登歌執事官

各共迺職武舞執干戚進贊引奏就位

皇帝就位立

右盥洗就位

典儀贊瘞毛血迎

神司香奉香進立祇候司樂贊舉迎

神樂奏永豐之章樂作贊引奏就上香位恭導

皇帝詣香案前立奏上香司香奉香跪進於右

皇帝上炷香次三上瓣香畢奏復位恭導

皇帝復位立贊引奏跪拜興

皇帝率羣臣行三跪九拜禮樂止

右迎神

典儀贊奠帛爵行初獻禮司帛奉篚有司揭尊罍
勺挹酒實爵以次至案前恭俟司樂贊舉初獻樂
奏時豐之章樂作司樂舉節舞千戚之舞司帛跪
獻篚奠于案三叩司爵跪獻爵奠于塾中興各退
司祝至祝前跪三叩興奉祝版跪案左樂暫止贊
引奏跪

皇帝跪羣臣皆跪贊讀祝司祝讀祝辭曰維某年月日

皇帝致祭于

先農之神曰惟

神肇興農事萬世永賴茲當東作之時躬耕耜田祈諸
物豐茂為民立命謹以牲帛酒醴庶品之儀致祭

尚

饗讀畢興奉祝版跪安

神位前三叩興退樂作贊引奏拜興

皇帝率羣臣行三拜禮樂止武功之舞退文舞執羽籥

進

右初獻

典儀贊行亞獻禮司樂贊舉亞獻樂奏咸豐之章
樂作舞羽籥之舞司爵獻爵于左儀如初獻樂止

右亞獻

典儀贊行終獻禮司樂贊舉終獻樂奏大豐之章

樂作

舞同亞獻

司爵獻爵于右儀如亞獻樂止文德之

舞退

右三獻

既終獻太常寺贊禮郎一人少前西面立贊荅福

昨光祿寺卿二人奉福昨至

神位前拱舉退祇立于

皇帝之右侍衛二人進立于左贊引奏跪

皇帝跪左右官皆跪奏飲福酒右官進爵

皇帝受爵拱舉授左官次受昨如飲福儀贊引奏拜興

皇帝三拜興又奏跪拜興

皇帝行二跪六拜禮王公百官均隨行禮典儀贊徹饌
司樂贊舉徹饌樂奏屢豐之章樂作徹畢樂止

右受福胙徹饌

典儀贊送

神司樂贊舉送

神樂奏報豐之章樂作贊引官奏跪拜興

皇帝率羣臣行三跪九拜禮樂止

右送神

典儀贊奉祝帛香饌送瘞司祝司帛詣

神位前咸跪三叩司祝奉祝司帛奉篚興司香跪奉香
司爵跪奉饌興以次恭送瘞所

皇帝轉立拜位東旁西向俎祝帛過復位立典儀贊望
瘞司樂贊舉望瘞樂奏慶豐之章樂作陪祀王公
百官退贊引奏詣望瘞位

皇帝詣望瘞位望瘞贊引奏禮成恭導

皇帝詣

太歲殿上香樂止禮部尚書率太常寺卿屬恭請
神位復御上香行禮如儀

皇帝于具服殿更衣乃行

親耕禮禮畢還宮太常寺官徹

乾清門齋戒牌銅人送寺

右望座禮成

乾隆三十七年遵

旨議准

先農壇儀注

皇上御禮轎自外北天門入內北天門循

太歲殿後轉至

壇東北隅降輿詣

壇行禮禮成仍於降輿處

御禮轎詣

太歲殿上香

遣官饗

先農壇之禮先一日太常寺以祝版送內閣恭書受而奉諸

神庫至日雞初鳴遣官朝服詣壇贊引太常寺贊禮郎二人引由壇右門入行禮于階下上香贊升壇升降均由東階不飲福受胙王公不陪祀祝帛送座避立西旁饗畢順天府府尹率屬行耕耤禮餘均如前儀

右遣官儀

直省府州縣衛各建

先農壇歲以仲春亥日致祭省會以總督若巡撫一人主之若有故則布政使以次攝陪祀文武官及各執事人均如祭

社稷之禮先二日主祭官及各官致齋公所掃除壇壝內外祭日雞初鳴執事人入設

先農神案于正中南向陳鉶一簋二簋二籩豆各四案前設俎陳羊一豕一又前設香案一陳祝文香盤

鑪鐙左設一案東向陳帛一尊一爵三陳福酒胙肉于尊爵之次設洗于階下之東質明引班引陪祭官入引贊引主祭官入通贊贊執事者各司其事贊就位引主祭官至階下盥手就拜位立陪祭官按班就東西拜位立均北面迎

神上香讀祝行三獻禮餘儀均與祭

社稷同祭畢率屬行耕耨禮其府州縣官歲祭

先農壇並同

社稷祭期牲帛器數行禮儀節與省會同

右直省府州縣先農壇

皇帝親耕儀

歲仲春吉亥

皇帝躬耕

帝藉前期禮部疏請得

旨命親王郡王三人卿貳九人從耕順天府備

躬耕絲鞭耒耜飾以黃服耜黃犢稻種青箱備從耕三

王麥穀九卿豆黍青箱鞭及耒耜朱飾服耜黝牛
皆依期畢辦

右戒辦

先一日遣官祇告

奉先殿是日黎明順天府豫設案二於

太和殿東檐下以龍亭三分載

躬耕鞭耒種箱彩亭四分載麥穀豆黍種箱鑾儀衛備

曲益御仗樂部和聲署設鼓吹均竝於

午門外府尹率屬奉耕器入陳于第一案鞭耒耜
奉種箱陳于第二案中稻種左麥穀右豆黍

皇帝御中和殿閱

先農壇祝版畢記注官退俟丹墀

皇帝御保和殿戶部尚書侍郎率屬舉案入

太和殿南左門出北左門詣

中和殿內正中陳鞭耒案于北陳種箱案于南皆東
西肆遂及禮部尚書侍郎序立丹陛之南重行西

面記注官升西階復位立禮部尚書奏請

皇帝御中和殿閱耕器五穀種畢奏禮成

皇帝出殿門乘輿還宮扈從如儀戶部官舉案復于

太和殿東檐下順天府官升左階徹案奉鞭耒種箱
出

午門外仍設各亭內鑾儀校舁行前列繖仗導迎樂
作奏禧平之章至

先農壇由中門詣耜田耕所

右閱耒耜穀種

是日工部官灑掃

觀耕臺上下藉以椶薦張次於

具服殿之東設

御屏寶座于臺上正中南向武備院官供

御座鋪陳順天府官陳鞭耒種箱龍亭于藉田之左右

陳麥穀豆黍種箱采亭于從耕位之左右陳耕器

農器于臺下東西兩旁如儀

右陳設

鴻臚寺官乃辨位耜田之北正中為

皇帝躬耕位戶部尚書一人在右順天府府尹一人在
左禮部尚書一人太常寺卿一人鑾儀衛使一人
在前耆老二人農夫二人掌耕犢立表于左右從
耕田首東班王二人戶部兵部工部通政司各一
人西上西班牙一人吏部禮部刑部都察院大理
寺各一人東上皆順天府官屬丞倅二人從耆老

一人農夫二人掌耕牛樂部典樂一人和聲署正
二人丞二人立于藉田南北面工歌耒詞者十有
四人司金鼓板篴笙簫各六人頂帶耆老四人披
蓑戴笠執錢鎛者二十人麾五色采旗者五十人
耆老三十有四人農夫三十人相間為班魚貫東
西序立署正一人立于北東面鴻臚寺鳴贊一人
立于東西面一人立于西東面侍儀御史二人分
立鳴贊官之北東西面記注官四人立臺南階下

之西東面不從耕王公大學士及三品以上官夾
臺東西隅翼立陪位

右序位

屆時

皇帝親饗

先農禮畢前引內大臣贊引對引太常寺卿恭導

皇帝詣具服殿更黃龍袍少俟鑾儀衛官率輿尉迴輿

於

觀耕臺東階外從耕三王九卿暨陪位王公以下咸
蟒袍補服按班東西祇候執事官依位序立禮部
尚書太常寺卿奏時遂及前引大臣恭導

皇帝出殿南向詣耕耤位和聲署正舉旗三麾歌工樂
工以下齊赴耤田北前引大臣退於兩旁侍立從
耕三王九卿就耕位東西面立鳴贊贊進耒耜戶
部尚書奉耒耜贊進鞭順天府府尹奉鞭均北面
跪進興退

皇帝右秉耒左執鞭禮部尚書太常寺卿鑾儀衛使恭
導行

躬耕禮耆老牽牛農夫扶犁順天府府尹執青箱戶部
尚書隨播種左右鳴金鼓采旗招颺工歌三十六
未詞唱和從行

皇帝三推三返

每歲奉
加一推一返

旨畢歌止順天府府尹以

青箱復于龍亭鳴贊贊受耒戶部尚書跪受耒耜
贊受鞭順天府府尹跪受鞭皆興復置龍亭內

皇帝御補服禮部尚書奏請

御觀耕臺暨太常寺卿恭導

皇帝升中階

御寶座後扈內大臣隨升立

御座兩旁記注官升西階東面北上序立從耕三王九

卿以次受鞭耒耜老牽牛農夫扶犁順天府屬丞

倅一人執青箱一人隨播種三王五推五返九卿

九推九返釋鞭耒入侍班位立執事官以青箱復

各采亭內序班引順天府屬官及耆老農夫服本色服持農器至臺前西偏北面東上重行序立聽贊行三跪九叩禮退至耤田終畝

右

親耕

禮部尚書奏禮成

皇帝降東階乘輿由

先農門出

法駕鹵簿前導導迎樂作奏祐平之章

皇帝回鑾王公從各官以次退不陪祀王公百官朝服

集

午門外跪迎

午門鳴鐘王公隨

駕入至內金水橋恭候

皇上還宮各退

右

鑾輿回宮

恭遇

時巡省方遣官祭

先農壇禮畢順天府府尹率屬耕耤九推九返農夫終

畝畢望

闕行三跪九叩禮直省督撫耕耤禮同

儀見後

右順天府府尹耕耤

奉天府直省府州縣衛歲仲春吉亥省會總督若

巡撫率在城文官耕耤是日首縣知縣視土宜備
穀種青箱朱鞭耒服耜黝牛及他農器耕器豫陳
耕所耆老率農夫踈於田間通贊學弟子員分立
田首向

闕張畫屏設香案南向通贊立香案之南引班教諭
訓導立通贊之南皆東西面屆期致祭

先農禮畢各官易蟒袍詣耤田通贊贊行耕耤禮督撫
以下就耕所執事者授耒耜鞭皆右秉耒左執鞭

進耕督撫以府佐貳官一人執種箱一人播種布
政使按察使以首領官各道以州縣佐貳官知府
知縣以丞史執箱播種皆耆老一人牽牛農夫二
人扶犁各九推九返畢釋鞭耒以次序立田首西
面北上農夫遂終畝告畢事各官補服望

闕立通贊贊齊班引班分引督撫以下至香案前按
班序立重行北面耆老農夫稍遠列行北面隨立
贊跪叩興行三跪九叩禮畢各退若府不附省州

縣衛不附府者正官率佐貳丞史耕耤各以耆老
二人執箱播種餘儀同

右直省耕耤

欽定四庫全書

皇朝文獻通考卷一百一

三十一

皇朝文獻通考卷一百一

欽定四庫全書

皇朝文獻通考卷一百二

郊社考

十二

親蠶祭

先蠶

乾隆元年建

先蠶祠於都城北郊以季春吉己遣官致祭先蠶雍正
十三年河東總督王士俊疏請奉祀先蠶禮部議

於北郊依

先農壇典制建立

先蠶壇尋以侍郎圖理琛奏改立

先蠶祠於安定門外每歲季春己日遣太常寺堂官以
少牢致祭

七年建

先蠶壇於西苑定

皇后親蠶祀

先蠶之禮是年七月大學士鄂爾泰等奏言古制天子親耕南郊以共染盛后親蠶北郊以共祭服我

皇上親耕藉田以示重農至意乾隆元年議建先蠶祠宇所以經理農桑之道至為周備今又

命議親蠶典禮伏思躬桑親蠶歷代遵行但北郊蠶壇向在安定門外故明嘉靖時以后妃出入道遠親莅未便且其地水源不通無浴蠶所遺址久經罷廢考唐宋時后妃親蠶多在宮苑之中明代亦改

建於西苑伏讀

聖祖仁皇帝御製耕織圖序於豐澤園之北治田數畦環以溪水隴畔樹桑旁立蠶舍是育蠶之事

聖祖仁聖帝親加講求今逢重熙累洽禮明樂備之時親蠶大典關係農桑自應遵

旨舉行以光典禮其應相度蠶地建立蠶壇桑壇蠶宮從室之處請交內務府會同工部等衙門辦理至親蠶典禮所應齋祀躬桑授蠶治繭等儀注及選

擇蠶母蠶婦受桑布繅一切禮文事宜應交禮部
詳議請

旨奏上從之乃建

先蠶壇於西苑之東北南向一成方四丈高四尺四出
陛各十級西北為瘞坎東南

先蠶神殿西向覆以綠琉璃崇基三出陛左右宰牲亭
一井亭一北為

神庫南為

神厨壇東為

觀桑臺前為桑園

具服殿五間東西配殿各三間後殿五間配殿各三
間均覆以綠琉璃浴蠶河在宮牆之東自外圍北
垣流入由南垣出設牖啟閉木橋二橋東蠶署三
間蠶室二十七間均西向壇垣周百六十丈西南
隅正門三左右門各一禮部擬上儀注言

皇后親饗

先蠶應令欽天監選擇吉日禮部具奏兩請

皇上轉奏

皇太后如奉

懿旨

皇后親蠶之年禮部具題恭請行禮豫日設立

先蠶西陵氏神位於蠶壇之上太常寺先期奏

聞致祭前二日

皇后於正殿致齋至日以一太牢

親祀行三獻禮應陪祀者各致齋陪祀翼日

蠶則蠶未生
諏日

皇后詣桑壇行

躬桑禮蠶事畢蠶母率蠶婦擇繭之圓潔者貯筐恭獻

以告蠶事之登擇吉

皇后復詣蠶壇親臨織室行繅三盆手禮遂布於蠶婦
之吉者使繅而朱綠元黃之以供

郊

廟黼黻之用從之

蠶母二人於內外命婦中擇高年嫺禮
儀者充之蠶婦二十七人擇內苑熟悉

蠶事者充之

詳見儀注

臣等謹按蠶桑之利養育萬民王政要務故以親桑率之而必報功於始為其事者誠不忘本也伏讀

聖祖仁皇帝耕織圖詩二十三首自浴種以至成衣備悉蠶女之情狀其第十五圖為祀謝

御製云自是西陵功德盛萬年衣被澤無疆則

先蠶之祀亦待時而舉爾至於蠶神名號漢祀二神固

屬無稽鄭氏馬祖之說亦殊難據農始炎帝止稱
先農則蠶始黃帝止稱先蠶禮臣原議義理允當
及茲定禮列於中祀祭用太牢樂用六奏仲呂為
宮及諸禮儀皆折衷盡善焉

九年三月吉己

皇后親饗

先蠶壇翼日行

躬桑之禮

七年之秋既定

皇后親蠶禮冬十二月禮部具疏以

親饗

先蠶吉期上請欽奉

皇太后懿旨皇后親詣行禮是年首舉

親蠶大興行禮如儀

十一年定致祭

先蠶遣

妃恭代之禮先是禮部具儀親蠶典禮於

皇后不行親祭之年照例遣太常寺堂官致祭是年不行親祭禮部照例具題奉

諭旨從前建立蠶祠未議皇后親蠶之禮是以照祭祀例遣官今既舉行皇后親蠶典禮若遇不行親祭之年自應遣妃內一人恭代致祭所有行禮儀注大學士會議具奏尋議上嗣後或

皇后親饗或遣

妃恭代之處禮部照例兩請具題如奉

旨遣

妃恭代之年應交內務府請

旨從之嗣至十四年二月禮部具疏請代奉

諭旨

先蠶祭期禮部奏請照例遣妃恭代此於禮意未協夫
妃所恭代者代皇后也有皇后則妃可承命行事皇
貴妃未經正位中宮則親蠶之禮尚不當舉行何得

遣妃恭代應照皇帝不親行耕藉順天府尹致祭

先農之例於內務府總管或禮部太常寺堂官奉宸院
卿內酌派一人致祭方足以明等威而昭儀制於是
禮部遵行並載入會典及

皇后冊立乃復舉

親饗

先蠶及

躬桑之禮

皇后親祭儀

歲季春吉己

皇后親饗

先蠶先二日禮部尚書一人祗牲如儀

右祗牲

是日昧爽太常寺進齋戒牌銅人內監豫設黃案
一於

交泰殿之左內務府總管一人及宮殿監侍豫蒞於

乾清門太常寺卿率所屬恭奉齋戒牌在前銅人在後前引如儀至

乾清門內務府總管以授宮殿監侍恭設於

交泰殿案內齋戒牌南向銅人西向跪三叩退

皇后乃齋陪祀

妃

嬪公主福晉以下文官三品武官二品命婦以上咸

致齋

右致齋

眠割牲

儀與饗
先農同

先一日奉宸苑卿率屬潔壇上下藉以稊薦為座
坎於壇西北施黃幄於壇上太常寺官恭設

先蠶神座於幄內正中南向工部官張

皇后拜幄於南階上如式太常寺典簿具牲俎博士辨
簋簠簠豆登鉶之實以次展於

神厨太常寺卿詣

神庫以恭請

神位之儀指授蠶宮令退贊禮郎引內務府總管一人

詣

神厨周眡牲牢選豆太常寺官以陳設之儀指授官

殿監侍訖皆退

右設神座幄供張展牲器

至日雞初鳴內務府總管及宮殿監侍率內監入壇具器陳牛一羊一豕一登一鉶一簋簋各二邊

豆各十鑪一鐙二東設一案西向陳禮神制帛一
色香盤一尊一爵三設福胙於尊爵之旁加爵一
牲陳於俎帛實於篚尊實酒承以舟疏布罍勺具
內監設洗於具服殿樂部率掌儀司內監陳樂於
壇下東西分列如式

右陳設

辨行禮位壇上正中為

皇后拜位北向壇下西北為望座位西向當階左右為

陪祀

妃

嬪公主福晉拜位北面稍南左右為陪祀命婦拜位
按翼分列重行異等東位西上西位東上均北面
辨執事位司拜禱女官二人立於壇上

皇后拜位左右相儀女官二人立拜位後左右均東西
面司香女官一人司帛女官一人司爵女官一人
奉福胙女官二人序立東案之東西面接福胙女

官二人立於壇上之西東面壇下典儀司樂女官各一人當階左立西面傳贊女官六人二人立於壇南東西面二人立於

妃

嬪公主福晉拜位左右二人立於命婦拜位左右均

東西面樂工歌工

以童內監為之

序立於東西樂懸之次

女官掌瘞者立於瘞坎之西北隅

右辨位

未明前三刻步軍統領飭所部清蹕除道自

神武門至

壇門左右塗巷皆設布幃陪祀公主福晉命婦及執事女官朝服豫集壇內鑾儀衛率內監陳

駕鹵簿

詳見鹵簿於

順貞門外凡旂尉民尉皆內監充辰正初刻太常寺卿暨內務府總管赴

乾清門奏時宮殿監督領侍轉奏

皇后御禮服乘鳳輿出宮如儀陪祀

妃

嬪咸乘輿從由

順貞門

神武門北上門入陟山門至內壝左門相儀女官二

人跪奏請降輿

皇后降輿

妃

嬪咸降輿從前引女官十人右贊引左對引女官二人恭導

皇后入具服殿少俟

妃

嬪隨入配殿祇俟傳贊女官引公主福晉命婦等於

具服殿門外東西序立祇候執事女官之外補闕八人以備執事之闕

凡女官均於宮人內選充如不足於內府及入旗命婦內選充

右車駕詣壇

辰正一刻蠶宮令詣

神庫上香跪三叩興恭請

先蠶神位內監十人前引入壇奉安座上畢相儀奏請
行禮

皇后出具服殿盥司盥跪奉帨巾盥畢詣壇

妃

嬪以下隨行司拜褥女官豫設拜褥於壇上拜次贊

引對引女官恭導

皇后陞中階就拜位前北向立前引十人止立壇下相
儀二人隨侍傳贊引

妃

嬪公主福晉及命婦均就拜位序立典儀贊執事者
各共乃職贊引奏就位

皇后就位立

右盥洗就位

典儀贊迎

神司香奉香進至香案前祇候司樂贊舉迎

神樂奏庥平之章樂作贊引奏就上香位暨對引恭導
跪

皇后跪奏上香司香進香

皇后上炷香三上瓣香興贊引奏復位暨對引恭導

皇后復位立奏跪拜興

皇后行六肅三跪三拜禮傳贊贊跪叩興

妃

嬪以下隨行禮樂止

右迎神

典儀贊奠帛爵行初獻禮司帛奉篚司爵奉爵進
至案前祇俟司樂贊舉初獻樂奏承平之章樂作
司帛跪獻篚奠於案一叩興司爵跪獻爵奠於墊
中興皆退樂止

右初獻

典儀贊行亞獻禮司樂贊舉亞獻樂奏均平之章
樂作司爵獻爵於左儀如初獻樂止

右亞獻

典儀贊行終獻禮司樂贊舉終獻樂奏齊平之章
樂作司爵獻爵於右儀如亞獻樂止

右三獻

典儀贊答福胙奉福胙二人恭奉福胙詣

神位前拱舉退祇立於

皇后拜位之右接福胙二人進立於左贊引奏跪

皇后跪左右女官皆跪奏飲福酒右女官進福酒

皇后受爵拱舉授左女官次受胙如飲福之儀贊引奏

拜興

皇前一拜興又奏跪拜興

皇后行四肅二跪二拜禮

妃

嬪以下均隨行禮典儀贊徹饌司樂贊舉徹饌樂奏

柔平之章樂作徹畢樂止

右受福胙徹饌

典儀贊送

神司樂贊舉送

神樂奏洽平之章樂作贊引奏跪拜興

皇后率

妃

嬪以下行六肅三跪三拜禮樂止

右送神

典儀贊奉帛香饌送瘞司帛詣

神位前跪一叩司帛奉篚興司香跪奉香司爵跪奉饌

興以次恭送瘞所

皇后轉立拜位旁西向

起拜

俎香帛過

仍布

復位立興

儀贊望瘞陪祀

妃

嬪公主福晉命婦退贊引奏詣望瘞位樂作恭導

皇后詣望瘞位望瘞奏禮成恭導

皇后詣具服殿更衣

妃

嬪隨入便殿更衣樂止蠶宮令恭請

神位復御上香行禮如儀

皇后還宮宮殿監侍徹

交泰殿齋戒牌銅人授太常寺官送寺越日

皇后乃率從桑之

妃

嬪公主福晉命婦行

躬桑禮

右望座禮成

遣

妃致祭

先蠶之禮先二日及陪祀之公主福晉命婦均致齋所

司供具如式至日味爽

妃朝服乘輿詣壇清道辟除如常儀至內壝右門降
輿入行禮於階下上香贊引壇升降均由東階

妃

嬪不陪祀不飲福受胙香帛送座避立西旁餘如前
儀

右遣妃儀

皇帝遣官致祭

先蠶之禮所司供具如前儀至日鷄初鳴遣官朝服詣

壇贊引太常寺贊禮郎二人引由壇左側門入行
禮儀節與饗

先農同

右遣官儀

皇后躬桑儀

歲季春

皇后躬桑前期三日禮部具疏以請

皇帝承奉

皇太后懿旨下

制報可乃徧布諸司供備內務府豫奏以

妃

嬪二人公主親王福晉以下縣君鎮國公夫人以上

三人文三品武二品官以上命婦四人從蠶採桑
掌儀司治桑畦飭採桑鉤筐

皇后金鉤

妃

嬪銀鈎均黃篚公主福晉夫人命婦均鐵鈎朱篚依

期畢辨

右戒辨

皇后既以吉已饗

先蠶禮畢蠶已生翼日

如蠶未生則視蠶生訓日

皇后散齋一日從採桑

妃

嬪公主福晉夫人命婦畢齋宮殿監侍設案於

交泰殿內正中東西肆又設案於左右南北肆率內
監至

內右門祇候是日執事官咸蟒袍補服黎明內務府
官以龍亭一載

躬桑鉤筐永亭一載從採桑鉤筐內鑾儀校舁行掌儀
司官前導總管暨蠶宮令從由

隆宗門至

內右門亭止宮殿監督領侍率蠶宮令丞暨內監恭

奉鈎筐以次入

內右門陳

皇后筐鈎於

交泰殿中案陳

妃

嬪公主福晉夫人筐鈎於左案陳命婦筐鈎於右案

皆筐左鈎右畢乃奏時

皇后吉服出

御交泰殿

妃

嬪隨出侍立

皇后先閱鈎次閱筐既徧還宮

妃

嬪從入宮殿監侍奉筐鈎出

內右門仍置各亭內以次昇行出

隆宗門鑾儀校接昇前引如初至內務府署旗仗前

導導迎樂作奏禧平之章及西苑奉宸苑卿自門
迎入蠶宮令分陳於採桑所

右閱筐鉤

屆期蠶宮令率內監潔掃具服殿內外及

觀桑臺上下藉以梭薦設

皇后觀桑寶座於臺北正中南向供

御座鋪陳臺下桑畦東西首行第一株為

皇后躬桑位東向執鉤相儀一人在右執筐相儀一人

在左東西第二行一株為

妃

嬪從採位第三行一株為公主福晉夫人從採位第四行一株為命婦從採位執鈎筐蠶婦各二人皆在左右傳贊女官二人在臺南左右北面侍班福晉夫人命婦在女官之南東西面內侍率童監歌採桑辭者十人司金鼓板篳篥簫者二十有四人於臺前東西麾五色采旂者四十人於桑畦外東

西分班序立

右序位

是日黎明蠶宮令啟西苑門從桑侍班公主福晉夫人命婦及執事女官蠶母蠶婦咸蟒袍補服豫至西苑南門內序立祇候辰正二刻禮部尚書內務府總管詣

乾清門奏時已初刻宮殿監侍轉奏

皇后御龍袍乘輿出宮從桑

妃

嬪嬙袍乘輿從詣西苑如饗

先蠶儀

右車駕出宮

皇后駕至西苑詣具服殿少竢傳贊分引

妃

嬪公主福晉夫人命婦就從採位立引侍班之公主

福晉夫人命婦就侍班位立執事女官暨童監咸

依位序立典儀奏請

皇后行躬桑禮

皇后出具服殿前引後從如常儀至桑畦北正中相儀

女官一人奉鉤跪進於右一人奉筐跪進於左興

皇后右持鉤左持筐東行桑畦外采旂招颺臺前內監

鳴金鼓歌採桑辭

辭詳
樂考

皇后至東第一株桑前東向採桑一條蠶母二人助採
復行至西第一株桑前東向採桑二條蠶母助採

亦如之採畢歌止各退

皇后以鈎筐授相儀相儀二人跪受於左右興復於龍

亭退俎臺隅典儀奏請

御觀桑臺贊引對引命婦恭導

皇后陞臺御座

妃

嬪以下採桑各蠶婦一人授鈎一人授筐二人助採

妃

嬪公主福晉夫人採桑五條命婦採桑九條畢咸釋
鉤筐授蠶婦復於采亭

妃

嬪登臺侍立

皇后寶座前左右公主福晉夫人命婦退入侍班位立
執鉤筐者皆退典儀相儀各女官歛諸筐次第置
於臺南傳贊引蠶母蠶婦至臺前北面跪典儀舉
皇后懿筐授蠶母蠶母恭受次舉

妃

嬪以下從桑各筐授蠶婦蠶婦受訖皆興奉筐至蠶室切之蠶婦灑箔禮成

右親桑

蠶母以禮成告典儀典儀跪奏

皇后駕興贊引對引恭導

皇后詣具服殿典儀奏陞座

皇后陞寶座傳贊分引

妃

嬪以下東西序立次公主福晉次夫人次命婦次蠶母蠶婦東位西上西位東上皆北面傳贊贊跪叩興皆行六肅三跪三叩禮退典儀奏禮畢

皇后降座陞興警蹕

妃

嬪從還宮如來儀公主福晉以下皆退

右禮成回宮

及蠶成蠶母蠶婦擇繭貯筐以獻

皇后遂以獻於

皇帝

皇太后乃擇吉日

皇后行繅三盆手禮採桑

妃

嬪從繅是日乘輿出宮警蹕如常儀至織室繅盆前

妃

嬪侍立蠶母漬繭於盆以手出緒握其總跪進

皇后

皇后受總親繅三少退立

妃

嬪進繅以五為節遂布於蠶婦之吉者使繅禮畢乘

輿還宮警蹕如來儀

右獻繭繅絲

皇朝文獻通考卷一百二